



閩媛典第一百二十七卷

閩節部列傳九

明四 葉叔寶妻毛氏

按處州府志毛氏葉叔寶妻年二十八而寡生二子長希文三歲次希道甫六月誓不再適孀居二十七年勤事紡織以奉舅姑葬祭盡禮洪武二年旌表

朱彥祥妻何氏 葉仲銓妻林氏

按處州府志何氏朱彥祥妻年二十四寡撫子事姑竭力盡職孀居二十一年洪武十年旌表

按處州府志林氏葉仲銓妻年二十三夫亡誓無他志教子養姑葬祭盡禮孀居二十四年洪武二十七年旌表

楊遂卿妻張氏 徐心甫妻常氏 梁彥廣妻章氏

按處州府志張氏楊遂卿妻年二十四夫亡止一幼女姑年八十憐其孤苦命再適氏泣血誓不他食洪武中旌表 按處州府志常氏徐心甫妻年十九夫亡遺腹生子紹宗形影相弔孝養舅姑

古今圖書集成

葬祭盡禮孀居五十八年洪武間旌表

按處州府志章氏梁彥廣妻年二十七而寡敬以事姑

慈以教子洪武中旌表

陳孟吉妻黃氏

薛寵妻周氏

按處州府志黃氏陳孟吉妻年二十二夫亡黃娠方三月夫兄利其產欲嫁之黃誓死不他適及彌月生子名愷撫之成立以壽終 按處州府志周氏薛寵妻及笄歸寵生二子夫亡痛哭幾絕年二十三撫育遺孤誓無他志善事舅姑內外咸稱節婦

余岩妻葉氏

何彥統妻陳氏

按處州府志葉氏余岩妻歸半載夫亡葉年十八誓不再適生遺腹子壽孀居五十五年仰事俯育克盡其道 按處州府志陳氏何彥統妻生二子夫亡誓不易志後二子相繼喪陳志益堅孀居六十年以壽終

葉德善妻鮑氏

按處州府志鮑氏葉德善妻至正末善以勳授處州衛千戶歿於官鮑時年十九無子誓不再嫁勤

紡績以事舅姑始終一節家日以替志日益堅洪武三十年耆老姚仲安詣闕上其事下有司覈實旌表

朱允正妻鄭氏

按處州府志鄭氏庠生朱允正妻年十九寡哀痛幾絕撫二月遺孤備諸艱苦姑病籲天願以身代聞者莫不感動姑逝身爲含殮擗踊之餘嘔血不起年僅二十八卒

包志伊繼室鄭氏

按處州府志鄭氏諸生包志伊繼室十九歸包踰年而夫歿撫前妻兒女若親生爲之婚娶教訓俾得成立子亦克孝宗族鄉黨稱之執節四十餘年有司表其廬

黃九宮妻李氏 季君問妻萬氏

按處州府志李氏黃九宮妻宮亡李年二十二家徒四壁矢志守孤親戚慮其少勸其再醮李誓死靡他紡績度日撫一子苦讀得入黌序 按處州府志萬氏季君問妻能詩夫亡守節不二嘗自

繡梅花一枝并詩一絕於枕曰灑灑英標別一奇歲寒心事有誰知妾心欲與同貞白枕上慙慙繡

古今圖書集成

一枝有詩集數卷藏於家

羊惠妻朱氏

曹養志妻盧氏

周伯弘妻田氏

按處州府志朱氏羊惠妻年二十八而寡子幼或諷改適氏涕泣嚙指幾絕益堅其操

按處州

府志盧氏僉事曹養志妻以擅納貢使被刑盧備艱苦攜夫骸骨歸葬於鳳凰山下守志終身

按處州府志田氏周伯弘妻年二十九而寡子女俱在襁褓旁無期功之親堅守不二侍郎李棠爲

立傳

朱仕清妻陳氏

按處州府志陳氏朱仕清妻年二十四夫亡號慟幾絕誓無他志以節終

徐伯龍妻夏氏

按處州府志夏氏名淑榮徐伯龍妻元季夫死於賊夏年二十一賊黨有宋茂四者欲強娶之夏聞嘆曰夫被殺尚未之報今反脅我遂引刀斷髻擲地曰吾頭可斷吾身不可辱復來吾當以頭與之賊不敢犯自是不茹葷酒事姑育幼三十餘年節操益堅壽六十卒洪武間劉誠意爲之傳至嘉靖

間御史舒汀表其門

陳氏梅氏 章氏朱氏

按處州府志陳氏趙叔範妻梅氏叔範子敬之妻俱早寡姑婦相依慈愛篤至宋濂爲之傳洪武初鎮衛以御書樹萱堂三字賜表其門 按處州府志章氏張如璋妻朱氏如璋子文高妻父子俱

早喪朱孕方數月及生子又天章年六十雙目喪明飲食皆需朱紡績二十餘年姑婦同老

宋傑俊妻朱氏

項氏附

按處州府志朱氏宋傑俊妻傑俊左庫人娶朱氏名珮早寡二子長鼎次澄澄天鼎生賜寶未幾鼎夫婦偕亡賜寶娶項氏名松賜寶亦亡項年二十朱曰吾年未三十而哭夫五十而哭子今年七十三矣又哭孫何以生爲項曰兒有身四月矣天賜幸遺腹生男宋氏之宗猶可延也後六月果生男名天祐未長亦死利其貴者多方說之嫁項以死誓乃止人稱宋氏兩節

張文佐妻陳氏 何天澤妻李氏 劉永紳妻宋氏

按處州府志陳氏張文佐妻年二十寡八十餘年終洪武間旌表 按處州府志李氏何天澤妻

年二十八寡家貧教子苦節終身

按處州府志宋氏劉永紳妻既歸劉家日貧乏奉養舅姑嚮

粧資無吝越數載夫亡堅志守節至死不變

王漢永妻劉氏

葉鑑妻某氏

謝幼教妻陳氏

按處州府志劉氏王漢永妻年二十四夫病思瓜不得而死劉苦志守節終身不忍食瓜事聞旌表

按處州府志某氏葉鑑妻年二十五夫亡遺孤甫兩月紡績膳姑撫子成立郡守張紘復其家

按處州府志陳氏儒士謝幼教妻貢生陳恭女也年二十三夫亡子一夔生甫六月貧歸母家守節教子成立卒年七十五

俞晃妻季氏

吳安定妻徐氏

項彥成妻金氏

按處州府志季氏俞晃妻年二十五夫亡寡居五十六年如一日事聞表旌

按處州府志徐氏

吳安定妻年二十六夫亡徐守志終身克全婦道年六十餘洪武間旌表

按處州府志金氏項

彥成妻夫亡金年二十七守志不改以紡績孝養舅姑喪祭盡禮洪武間旌表

林庭光妻蔡氏

項景中妻劉氏

按處州府志蔡氏林庭光妻年二十一夫亡子甫週歲姻戚勸其改嫁蔡卽斷髮自誓紡績事姑撫子成立姑歿喪葬如禮年八十一終 按處州府志劉氏項景中妻夫亡劉年十九守志不移值山寇擾攘挈家避難溫城孝事舅姑撫育幼子寇退還鄉克成家業洪武間旌表

祝忠仁妻葉氏 施叔偉妻葉氏

按處州府志葉氏祝忠仁妻夫喪家貧苦節先曾割右股以報母旣孀會姑病仍割左股療姑紡績撫子利見成立以壽終 按處州府志葉氏施叔偉妻年十九夫亡守節堅志不磨洪武三年旌表

張伯成妻林淑柔

按閩書林淑柔張伯成妻伯成早喪遭元季世亂舅姑俱歿氏攜子女往依兄弟拮据教育克有成立洪武間年八十餘終

蓋昊妻楊氏

按閩書楊氏蓋昊妻早寡撫育二孤世英世雄備極貧苦忽患足瘡出野遇蛇經瘡處涼氣透骨髓

血迸流移時足愈人謂苦節所感世英兄弟事母甚孝

江中標妻唐氏

王顯妻李氏

按閩書唐氏江中標妻蜀相唐時興妹也標亡子殤自矢必死姑勉爲立嗣長燼艱難拮据苦守四十餘年旌表 按閩書李氏王顯妻顯歿李矢節自堅寢室不越戶外四十餘年

陳思恭妻莊氏

按閩書莊氏陳思恭妻恭海賈也生子寶四月去入海不還人曰思恭死矣誘莊嫁不許無何思恭歸悲喜交集久之復入海死誘者曰夫真死矣可奈何莊曰寶在寶長請學士宋濂爲之記思恭蓋嘗娶妾於浙中生一子貧寓外氏莊氏遺錢使營生以償思恭之夙負

林以德妻王氏

按閩通志王氏長樂人適林以德年二十三而孀舅姑老子孔居尙幼其兄憐其年少欲嫁之氏誓死不從養老守孤不易其操孔居長娶戴氏未幾孔亦亡遺二孫一在襁褓氏躬撫之家貧勤女工以贍衣食及長命從賢師洪武二十八年有司上其事旌表年九十有九

湯泉妻金氏

按閩通志金氏名善觀定海千戶所百戶旺之女歸本所正千戶湯泉生子銘方七歲而泉歿善觀年二十五斷髮誓死躬蠶桑紡績以養姑姑病晝夜扶持不少離側湯藥必親晨夕禱以身代姑歿鬻裝以營殯葬慟哭幾至喪明事聞旌表

蕭貢才妻顏氏

按閩通志顏氏名鏗順昌人歸蕭貢才年二十七貢才歿子清翁方襁褓氏誓不他適值元季兵亂顏挾遺孤陟險而逃得免於難洪武間縣令胡衆仲以聞詔旌表

王勝寶妻葉氏

按閩通志葉氏南平王勝寶妻端莊靖恪有賢行勝寶病亟語葉曰一子甫晬父母又垂白如不起奈何葉矢之曰妾若有異志如是日語罷而勝寶歿葉年二十五守志以終舅姑之養并撫幼子成人年七十一卒兵部尙書孫原貞鎮八閩賦詩詠之

馬珽保妻趙氏

按福州府志趙氏懷安馬珽保妻珽保死趙氏年二十四矢志靡他有二子長閏次旺趙素知書家貧撫二子教之閏長遊鄉校閏之孫俊領鄉薦今大司徒森趙六世孫也始珽保少育於裴及大司徒貴乃上疏復姓聚族謀曰吾始家馬坑窮鄉入閩城實自吾六世祖始向微六世祖母趙今城中無馬氏矣且趙賢應旌表有司未之舉其立節母堂世祀之衆咸曰然南京兵部尙書汶上吳嶽爲之記謂司徒事雖制限禮緣義起云

陳伯惠妻戴四娘

按福州府志戴四娘長樂陳伯惠妻伯惠早亡撫遺腹子全後舉永樂進士第二歷翰林侍讀戴年八十有八歲時爲壽邑人高廷禮繪圖以賀榜其堂曰貞壽大學士胡文穆公廣爲之記

王英妻張氏

按福州府志張氏閩縣王英妻英客死張氏扶柩還葬洪武初有備倭武臣以重賄謀致之張誓必死懷刃自防日夜號哭不絕聲竟全其節

林安妻林氏

按福清縣志林氏林希逸孫女年十九適莆田林安生子迪迺歲安亡氏年二十二撫迪成人見四孫之冠婚洪武初旌表

林克威妻陳琬奴

按福寧州志陳琬奴在坊後哺林克威妻克威父天成贊天祿克復州治後以事見猜天祿夜擁兵屠其家琬奴倉卒抱嬰孩與婢曳姑王氏從後門遁去夜匿堂源莊後以首飾賄人收遺骸年二十有四孤未再週潛移依母家紡績養姑撫子其母諷適人陳泣曰棄老稚而他適禽獸不爲卽自縊幾絕姑奔救乃免洪武戊午秋姑歿以禮殯殮將葬夜夢人曰汝姑墓地在西南嶺方家洋明日果得地以葬攜孤廬墓而返守節至八十有三

林愈妻方惠女

按永福縣志方惠女林愈妻也年十八適愈僅一載愈亡方葬其夫爲雙壙舅姑早亡無期功之親外姻有慕其容色者欲脅娶之惠女知卽還父母家父母憐其少而無子亦諭令改適終不從居數月父母俱喪弟纔鎡四歲惠女撫之成立洪武三十年舉人材任江西浮梁縣主簿惠女年六十三

卒鑱舉其柩與愈合葬

王拱妻林玳小

按永福縣志林玳小王拱妻拱翰林檢討偁之次子生子樞方八月而拱亡時林年二十有一守節五十年卒

茅元妻張氏

婦黃氏附

按僊遊縣志張氏進士茅元妻元登元至正乙未進士任趙州路司判轉大提管明洪武開國時元死氏年二十八雙孤鬻亂矢志靡他舅姑相繼沒喪葬盡禮二子先氏喪撫孫師魯成人翰林王信功紀其實年七十有五長婦黃氏亦守節終身

方吉妻蔡氏

黃濟妙妻江氏

按惠安縣志縣蔡氏方吉妻年二十六吉亡守節四十年卒

按惠安縣志江氏黃濟妙妻年二

十一而寡撫子成立苦節三十三年卒

錢寶妻何氏

按惠安縣志何氏崇武千戶錢忠母也忠父寶世爲廬江人明興從軍有戰功授鳳翔衛百戶陣亡何氏年二十四長子禮尙幼次忠遺腹後三月始生氏攜二子歸鄉里撫育無他志及洪武定鼎追論寶功以禮襲職未幾復夭何氏泣謂忠曰汝父兄一綫之緒在汝不可不勉忠後以父廕陞授崇武所正千戶何氏就養封太宜人年八十餘終

陳仲憲妻王氏

陳文妻郭氏

按惠安縣志王氏陳仲憲妻年十九歸憲八年而憲亡氏撫六歲子禧事姑柳氏無遺憾禧夭又撫孤孫疇成立壽終 按惠安縣志郭氏陳文妻年二十二而寡苦節四十年終

蔡安繼室黃妙觀

按龍溪縣志黃妙觀字微志黃思甫女潮陽令蔡安繼室也元至正丙午安赴京便道過家時陳友定兵陷漳州安被擒黃年二十七安與黃訣曰此行生死未可期汝不能守須再事他人黃拚淚答曰何薄妾之甚遂剪髮自誓安果不還黃紡績教子矢志靡他母欲奪其志黃始終不易洪武間有司以聞詔旌表復其家

宋史妻陳貞姐

按龍溪縣志陳貞姐陳伯宗女宋史妻也洪武己卯夫病亟謂貞姐曰姑老子幼汝肯守否陳曰再嫁卽不若死爲安矣時年二十六史亡事姑恪盡婦道姑屢欲嫁之氏竊縊於房中姑覺救之不死卒全其節

康居祿妻黃五姐

按龍溪縣志黃五姐黃得夷女里人康居祿妻年二十六夫亡子昇方四歲五姐勤紡績以奉舅姑鞠孤幼誓無他志洪武丙午五月雨暴水漲浮地數尺民間漂溺殆盡五姐登屋呼天水勢頓殺舅姑相繼歿盡賣家業以畢喪葬鄉黨賢之

黃伯英妻雍氏

按長泰縣志雍氏在坊黃伯英妻坊民雍四次女也年十八嫁伯英二十七而寡子福進方九歲女甫三月舅姑俱老家無餘資夜辟繡朝市餅奉甘旨無缺舅姑相繼歿質貸以襄喪事力不得如願每以爲恨丙辰冬同福進於欽化里湖頭水磨磨麥鄉規約以先後至爲序有強民廖仲絃後雍至

而奪之先麥入磨磨不爲旋絃曰水弱也益堰水以激磨水怒下如雷磨終不旋衆驚訝絃出其麥而下雍麥磨旋如初咸詫爲節孝所感孀居三十餘年年六十耆老李維則等上其事洪武間詔旌其門

李德淵妻陳氏

按長泰縣志陳氏人和里李德淵妻龍溪縣陳景從次女也年十九喪夫遺腹四月生子天賜時舅姑與夫三喪皆未葬氏哀毀撫遺孤勞苦萬狀終克襄事孀居六十餘載恪守婦道年八十終洪武間詔旌表

官世慎妻王秀娘

按光澤縣志王秀娘官世慎妻有女德及笄歸官隨翁通判台州世慎歿於台王哀哭終身姻黨罕見其面兵部尙書譚公守台素知其賢及巡撫全閩以禮旌之卒年七十有二

黃應斗妻王祥娘

李子春妻黃足娘

按光澤縣志王祥娘黃應斗妻年二十而斗亡甘貧守制苦節教子辟纒易食以事翁姑年八十四

學使旌其門

按光澤縣志黃足娘邑同知黃文魁妹在城李子春妻夫死黃年二十苦節以養翁姑撫子成立縣令上聞旌表

郭子成妻鄧奴娘

按光澤縣志鄧奴娘在城人適同里郭子成洪武丁卯子成以人才舉赴京沒旅邸鄧年二十二子俱孩舅姑老家貧無依鄧力紡績事舅姑惟謹親戚勸再嫁鄧曰夫去時囑善事二親弗與偕往恐二親左右無人也今夫已死何忍忘其言而遂背之俟二子成立奉舅姑終天年他日方可見吾夫地下及舅姑沒竭力營葬畢未幾卒年五十一

陳宗妻危道娘

按光澤縣志危道娘邑人陳宗妻宗幼鞠於姑爲姑子姑撫之不異己出宗奉姑亦如親母宗既娶危病革語危曰吾疾決不起吾姑將無所託汝能代我終養乎危曰君何出此不祥語萬一不諱何待君囑付耶旣而宗亡危哀毀幾不欲生事姑益謹姑嘗欲遣其嫁危具道夫語誓不食言姑年八十有五而卒喪葬盡禮